

## Lu tempu vacabbunnu

'Nzunnacchiata  
mezzu lu celu  
a luna ucchialia,  
sciogghi 'n'aceddu  
'na tìnira canzuni,  
d'argentu un cantu  
di 'na funtanedda  
di tristizza  
anninnia lu me cori  
stancu  
mentri lu tempu  
cecu e vagabbunnu  
cogghi e strascina  
nnì la vita  
juri e duluri  
di tuttu lu munnu.



*Quatrettu di marzu*

## Quatrettu di Marzu

Davanti l'annatu  
'a zà Cicca stava  
a l'ucchiatura  
du suli di marzu.  
Supra li spaddi  
'na sciallina avìa  
e cu' li manu  
di vini trasparenti  
lestà quattru carcocciuli  
spicchiava  
e ogni tantu  
qualchi pezzu di carduni  
si manciava.  
Tri picciriddi  
cu li pumidda  
di la facci arrussicati  
a "li pizza" jucavanu  
e a la giuvinizza  
canzuni d'alligria  
cantavanu.  
Un cani  
longu stinnicchiatu  
si nnì stava  
e cu la cura, ogni tantu  
qualchi musca si cacciava.  
Di 'nfacci appuiata  
a 'na scupa, a vicina  
parlava cu Rusidda  
chi affacciata a la finestra  
'u tappitu scutulava.  
S'intricciavanu li vuci

'nna vanedda d'un ventu  
friscusu accarizzata  
e d'u martidduzzu  
d'u scarparu trapuntata.  
Aceddi tissianu  
di voli lu celu  
mentri nnà l'ortu  
l'ucchiuzzi rapia  
qualchi ciuri di melu.

# Furmicheddi

L'omini  
di 'sti tempi  
mi fannu pinsari  
a li furmicheddi  
chi senza mai firmarisi  
s'affannanu  
a cogghiri muddicheddi.  
Ogni furnica  
di cà e di ddà  
va tuttu 'u jornu  
e riposu nun à.  
Comu l'omu mudernu  
chi peggiu d'iddi  
s'affanna curri  
travagghia e si scorda  
puru la so arma.  
'Mbriacatu di sirvizzu  
comu nà macina  
iddu gira  
e nun pensa  
a la morti  
e a la so tristi sorti.

## Quatrettu familiari

Ni 'na vanedda stritta  
dunni pari  
chi si vasanu li casi  
'na vicchiaredda  
fa la quasetta  
mentri quattro picciriddi  
satanu, s'arruzzulianu  
e 'u loru risu  
cadi nì balati  
comu l'argentu vivu  
chi tintinna.  
'U attareddu  
è longu stinnicchiatu  
a l'ucchiatura  
d'un raggiu di suli  
e tutti aspettanu  
lu pani friscu  
chi la matri 'mpastau.  
Già lu profumu  
si spanni nì la strata,  
già nì li vucchi  
acchiana lu disiu  
di un pizzuddicchiu  
di pani cunzatu.  
E la matri lesta  
tagghia 'na sciavata  
cu un filu d'ogghiu  
la metà ni conza  
arìanu e picurinu  
ci sbrizzia  
unci li du pezzi

li strinci forti  
pi' megghiu poi tagghiari  
e nì 'na 'nzalatera  
li va a pusari.  
Supra na siggitedda  
metti lu trubbeli  
e chiama li arzuna da vanedda.  
Currenu prestu  
li picciriddi a manciari  
e puru lu attu s'avvicina  
pi' li muddicheddi caduti  
putirisi liccari.  
Lu patri mentri arriva  
purtannu nà la facci  
l'arsura di lu suli  
e s'allarga lu so' cori  
a vidiri la scena  
e pì ringraziari di tanta furtuna  
a Diu rivolgi 'stà preghiera:  
- Grazie Signuri,  
pì 'sta paci e cunfortu di la vita  
vali la pena 'a me fatica!

## Acidduzzu

Acidduzzu  
cu l'ali spuntiati  
va' circannu  
muddichi d'amuri.

Va circannu  
lu caluri  
di la genti  
pì 'u so cori 'nfriddulutu  
quariari.

Iddu firitu  
nun pò chiù vulari  
picchì pisanti  
è di tanti tristizzi  
pisanti la sò vita  
di passari  
e senza amuri  
iddu nun po' cchiù  
campari.

# Aceddu vulissi divintari

Quannu viu  
l'aceddi vulari  
ju comu iddi  
vulissi divintari  
e nill'aria  
iri a jucari.

Vulissi cu lu ventu  
chi m'ammutta  
la terra vidiri tutta.

Supra li nuvuli  
acchianassi e  
a un raggiu di suli  
m'annacassi.

Pruvassi emuziuni  
di ranni intinzità  
e a me' vogghia saziassi  
di vera libertà.

E quannu lu celu  
e la terra  
s'abbrazzassiru  
dintra l'arcubalenu  
ju m'innissi  
e a me vita  
cu li so culura  
tincissi.

# Libirtà

Puru l'aceddu  
chi nun avi 'ncegnu  
nun voli catini  
e custrizioni,  
l'istintu  
lu purta a vulari  
nì lu celu  
dunni libiru  
si senti e senza frenu.  
Nun c'interessa  
aviri lu manciari  
e putirisi cu l'acqua  
lu beccu arrifriscari  
quannu si trova  
nì 'na argia chiusa.  
E l'omu  
chiù di l'animali  
nun voli chi nissunu  
lu custrinzi  
a canciari li so pinseri  
e i sò idiali.  
Liberu nasci  
pì fari e pì disfari  
comu a iddu piaci  
comu è giustu fari.  
Nissunu avi 'u dirittu  
di canciari  
l'esseri ti stissu  
e nù beni e nù mali.

## 'U suli

'U suli ucchialia  
'mmezzu lu celu  
li tristizzi di la genti,  
rufulia  
lu scrusciu d'acqua  
di 'na funtanedda  
si funni  
cu l'urchestra di la vita  
spicchia di luci  
lu friscu argentu  
e alleta tuttu 'u firmamentu.  
Rìdunu li casi e li jardina  
a stu miraculu  
chi si rinnova ogni matina.  
Vasa un curuzzu  
mestu e scunsulatu  
chi a lu sò caluri  
prestu è sanatu.

## 'A luna

Scinni a sira  
supra li casi  
e cummogghia  
tutta a campagna  
mentri a luna  
acchiana nì lu celu e nì lu muru  
e lu scantu  
passa di lu scuru.  
Cu la so' luci  
allaga puri li gnuni  
e alligria lu cori  
a tutti li pirsuni.  
Trasi u' silenziu  
dintra li stanzi  
e i mali pinseri  
di la menti  
leva a li genti.  
Fascinusu u sò chiaruri  
riccama perli argintati  
e tutti li cosi  
nì sunnu cummigghiati.  
'A luna  
'na bedda signura  
e di la sira  
idda è patruna.

# M'innamurai di tia

M'innamurai di tia  
e t'amu sempri.  
Sì stidda luminusa  
di lu celu.  
Ne' manu tu  
tinivi la me vita  
cu lu jatu  
accarizzavi lu me corpu.

M'innamurai di tia  
e t'amu sempri...  
Li ciuri senza tia  
nun hannu uduri  
'u celu sempri di nuvuli  
è cupertu  
'a luna  
chiù d'argentu  
nun riluci.

M'innamurai di tia  
e t'amu sempri...  
A vita senza tia  
nun avi sensu  
e aspettu... aspettu...  
di prestu  
veniti abbrazzari.

M'innamurai di tia  
e un ti pozzu scurdari.  
Ju senza tia  
nun pozzu stari.  
M'innamurai di tia  
e t'amu pi' sempri.